

■ GRISCHUN

Regenza vul esser pli rigurusa cun ils lufs

(cdm/fmr) La regenza grischuna preten- da in agir pli rigurus en la regulaziun dals lufs en Svizra, sco ella ha communitgà ier. La Regenza ha numadamain prendì po- siziun tar il project da consultaziun dal Departament federal per ambient, traf- fic, energia e comunicaziun concer- nent la revisiun da l'Ordinaziun da chat- scha. Quella vul reglar da nov la coexis- tenza tranter umans, animals da rapina gronds ed animals da nizz.

Il Cussegl federal propona tranter au- ter da sbassar las limitas cura che chan- tuns pon sajettar in luf u regular in triep da lufs. Il Grischun pretendia ussa però in'ordinaziun pli rigurusa. Uschia propo- na la Confederaziun tranter auter che diesch animals pitschens sco nursas duain esser mazzads dal luf per pudair schluppeter quel. Fin uss eran quai 15. Tenor la regenza è quella limita da diesch animals anc adina memia auta.

■ INIZIATIVAS AGRARAS

Extrem – però necessari

(rrt/fmr) I dovria mesiras extremas per ina midada en la dretga direenziun, uschia la devisa dal comité grischun che s'enga- scha per las iniziativas agraras federalas. Davos quel comité stattan la Verda Gri- schun e diversas organizaziun per l'am- biant. Mesemna ha il comité lantschà sia campagna. Tenor *Rolf Marugg* da la Ver- da Grischun, saja uss il dretg mument per ina midada, sco el ha ditg mesemna avant las medias. Il carstgaun haja la tendenza da reagir pir cura ch'i haja dà ina cata- strofa. Ma ussa saja il mument da midar insatge.

L'iniziativa per aua da baiver netta e l'iniziativa per ina Svizra senza pesticids sintetics duai crear ina agricultura pli ecologica. Cun in GEA a las duas inia- ziativa vul il comité promover la protec- ziun da las auas, ils terrens, la biodiversi- tad e la sanadad.

L'uniun purila grischuna è gia s'expri- mida encunter las iniziativas cun l'argu- ment principal che quellas sajan memia extremas. Las iniziativas van en votaziun ils 13 da zercladur 2021.

■ CUIRA



Il «Antistitium» en la citad veglia. MAD

Contribuziun per l'antistizi

(rrt/fmr) L'uschenumnà «Antistitium» a Cuira prevesa la plaiv evangelica da reno- var e transformar per totalmain 2,46 mil- lions francs. Sco la regenza ha communi- gà ier, vegn ella a contribuir 110 000 francs vi da quella renovaziun, la mesadad vegn contribuì da la Confederaziun.

L'antistizi a Cuira, situà directamain sper la baselgia da son Martin, è ina da las pli impurtantas chasas d'abitar en la citad veglia da Cuira. Sco in dals paucs edifizis è el restà preservà da l'incendi da la citad da l'onn 1574. Suentar la reformaziun ha el servi sco sedia uffiziala dal prer prin- cipal da Cuira.

Cuira daventa «Citad dal chant»

Novas localitads per il chant triling en il Grischun

BARTOLOME TSCHARNER/FMR

■ Il project «Cuira Citad dal chant» daventa realitad. En la Via Comerciala 19 èsi vegni preschentà ier las locali- tads che vegnan a servir als chors da la chapitala e dal conturn sco excel- lents locals da prova. *Christian Klucker* n'è betg mo in dirigent engaschà, mabain gist uschia versà è el sco promotur: Avant trais onns aveva el lantschà cun ina grup- pa d'interessents il project «Chasa dals chors» sin l'Arcas a Cuira. Uss al èsi reus- si da realisar ses project «Cuira – Citad dal chant» en il quartier City-West.

Perquai che la chasa sin l'Arcas è sa mussada sco memia pitschna per daventar il center dals chors da Cuira, tenor la propo- sta da *Christian Klucker*, *Gian-Reto Trepp* e *Heinz Girschweiler*, han els alura desistì da realisar lur project. «Dentant n'ans ha quell'idea betg pli laschada en ru- aus», di *Christian Klucker*. Els han cunti- nuà la tschertga per localitads adattadas. Suentar avair constatà ch'era las stanzas en l'anteriura scola da dunnas na vegnivan betg en dumonda, è *Klucker* à la tscher- tga d'in'otra soluziun e surtut d'in fauttur. Quel ha el chattà en la persuna da l'archi- tect *Thomas Domenig*. Lez è sa laschà in- tgantar da stgaffir in center per ils chors da Cuira, mettend a disposiziun il spazi ba- segnaivel en las localitads d'in anteriur la- vuratori en la Via Comerciala 19. Il nov «Center dal chant» è era cuntanschibel bain cun ils meds publics u privats.

«Da la pratica, per la pratica.»

L'uniun «Cuira – Citad dal chant», fun- dada ils 2018, dispona davent d'ussa da pliras localitads spaziusas d'ina surfa- tscha d'abundants 1000 m² che vegnan mess a disposiziun als chors sco stanzas d'exercitar. Plinavant hai ina biblioteca cun passa 30 000 titels, ina sala cumi- naivla cun bistro, ina stanza per sedutas e bier equipadi tecnic. «Nossa finamira è restada quella da rinforzar il chant triling



Las stanzas dal nov center da chant «Citad dal chant» a Cuira èn prontas per vegnir duvradas dals chors.

FOTO FLURIN CLALÙNA/RTA

grischun cun stgaffir in center commu- nabel per ils chors da la citad a Cuira e dal conturn e d'als dar in dachasa, nua ch'els pon lavurar e s'entupar per baratar ideas ed experiensas. Nus avain stgaffi in center da cumpetenza per il chant en general, nua che nus mettain a disposiziun als chors betg mo localitads da far prova, mabain er auters servetschs professionals, sco cussegliazions en du- mondadas musicalas, agid d'elavurar con- cepts per programs, organisar concerts, far reclama, rimnar daners e surtut cun porscher diversas scolaziuns», di *Klucker* che quinta era cun arranschaments da la Federaziun Svizra da l'Europa Cantat e la Concurrenza svizra per chors.

Dar impuls suenter la pandemia

Ma lur center da cumpetenza duai en emprima lingia dar novs impuls al chant choral che ha patì zunt durant la pan-

demia. Lur organizaziun porscha perquai curs per chantaduras e chantadurs, per dirigentas e dirigents, organischa refe- rats, inscuters da chant ed auters eveni- ments chantics. «Cun noss chors vegnin nus er ad ir or en il center commercial «City West» e far provas avertas per pur- tar il chant tranter la glieud, ed uschia dar nova vigur al moviment da chors.»

Enfin uss èsi gia set chors ch'exercite- schan en las localitads da la «Citad dal chant», ed ulteriurs tsching han mussà grond interess. Ma il «Center da chors» porscha spazi avunda per anc ulteriurs chors che pon s'annunziar tar *Christian Klucker*, perquai ch'il center duess vegnir tratg a niz tant sco pussaivel.

Aria netta procura per segirtad

Per realisar il concept tschertga l'uniun, che vegn presidiada da *Gian Reto Trepp*, il sustegn dal maun public e da fautors da

l'economia privata, fertant che ulteriurs suprastants sco *Heinz Girschweiler*, *Christian* ed *Anna Laura Klucker* e lur gi- danters procuran per la part pratica. Els han dentant endrizzà las localitads ch'èn ussa prontas per vegnir duvradas. Mintga stanza cuntegna tut il necessari per chan- tar sco mobiglia adattada, portanotas, stgaffas per mintga chor etc.

Essenzial èsi, che mintga stanza dispo- na d'in filter che nettegia tutt'aria per 98% en terma da 12-15 minutas, uschia ch'els chantadurs pon chantar cun gron- da segirtad er en il temp da la pandemia.

Però per *Christian Klucker* e sia uniun èsi il pli essenzial da pudair porscher cun lur center in lieu d'inscuter e da barat cultural a tut ils chors da la regiun per rin- forzar la solidaritad tranter las uniuns ed animar era glieud giuvna da sa participar dal chant che quel survegnia nov anim per sa svilupper. Ils chors basegan tal.

«Corona ha era prendì il schlantsch da scriver»

La Chasa Editura Rumantscha durant l'onn da corona

SANDRO BUCHLI/FMR

■ La Chasa Editura Rumantscha (CER) ha publictà ier ses rapport annual. L'onn passà èn vegnids vendids passa 2800 cudeschs rumantschs. Quai saja tenor la manadra da la Chasa editura Ru- mantscha *Anita Capaul* in dumber stabil en cumparegliazion cun l'onn avant. La CER ha pudì edir tsching novs cu- deschs, ina reediziun e plirs e-books. La FMR ha fatg quatter dumondas ad *Anita Capaul*.

FMR: L'onn passà è stà l'onn da corona. Tge è stà spezial per la Chasa Edi- tura Rumantscha?

Anita Capaul: La lavur vi da las publi- cazions è stada la medema sco tschels onns. Quai che ha natiralmain mancà durant quest onn è il contact cun il pub- lic ed ils auturs. Be paucas occurrenzas han gi lieu pervi da corona. Nus ans avain stuì adattar a la situaziun ed a las prescripziuns. Tschertas vernissaschas avain nus però tuttina pudì organisar – simplamain en furma «ibrida». Per ex- empel la vernissascha dal nov cudesch da *Viola Cadruvi*: Il discurs cun l'auto- ra ha gi lieu «live» en la biblioteca chantunala avant in pitschen public. E cun in livestream digital han tut ils in- teressads pudì guardar l'occurrenza en la rait. Quai ha funcziunà bain.

Ina chasa editura sto avair auturas ed auturs che scrivan. Co statti tar la

CER, avais vos anc avunda manu- scrits?

Gea, nus avain anc manuscrits e cu- deschs ch'èn sin rucca, per exempel il cudesch da giubileum da *Flurin Cama- thias* ed ils raquints dad *Anna Ratti* che vegnan publicgads questa stad. L'onn passà n'avain nus dentant betg survegni dapli manuscrits che auters onns. Ins avess gea pudì pensar che cun il lock- down avessan auturas ed auturs gi dapli peda per scriver. Ma quai n'è betg stà il cas. Er tar autras chasas edituras è quai sumegliant. Corona ha era prendì il schlantsch da scriver.

Il giubileum da 10 onns da la chasa editura, fundada dal 2010, è damai dà en l'aua. Prenda la CER anc suen- ter questa «festa»?

La chasa editura aveva previs da far ina turnea da giubileum – e quella n'avain nus betg pudì far. Ma nus avain tuttina pudì render attent a noss giubileum. Per exempel cun ina contribuiziun en la Ta- gesschau u cun films da purtret ch'èn da vesair sin youtube. Plinavant avain nus fatg l'atun in'acziun da cudeschs en tuttas scolas rumantschas. Nus na levan en quest senn betg «celebrar» noss giu- bileum. Ma simplamain far nossa lavur

sco chasa editura e mussar preschien- tscha. E quai è gartegià bain uschia.

E la ultima dumonda: Tge giavisch la manadra da la Chasa editura per la litteratura rumantscha?

Fitg simpel: Auturas ed auturs che han gust da prender enta maun il rispli ed il palpìri – e van cun curascha e slantsch vid raquinter istorgias ed exprimer lur maini.

E vinavant: in public che apprezzescha cudeschs rumantschs, leger è adina ina bun'idea!

Midadas en il gremi editorial

Tar la cumissiun da program da la CER datti duas midadas persunalas. Cuntanschi la limita dal temp d'uffi- zi en il gremi han *Annetta Ganzoni* e *Renzo Caduff*. Da nov en la cumis- siun èn ils romanists *Toni Vinzens* e *Valeria Badilatti*. Al cussegl per las ediziuns per creschids appartegnan: *Ursus Baltermia*, *Andrea Luzius Rassel*, *Bettina Vital* ed ussa ils dus novs *Toni Vinzens* e *Valeria Badilatti*.

Al cussegl per ils cudeschs per uf- fans e giuvenils appartegnan vina- vant: *Petronella Cavegn*, *Annalisa Schaniel* e *Barbara Cuffaro*.



Anita Capaul (san.) e la collavuratura Karin Kohler-Pattis èn cuntentas cun l'onn da gestiun 2020, malgrà la crisa da corona. FOTO CER